



Andreas Uldum

Inatsisartuni ilaasortaq, Demokraatit

/-Maani

## **§ 37 naapertorlugu apeqqut 2012-202. Innaallagissamik sipportumik tunisisinnaaneq pillugu akissut**

18-09-2012  
Sags nr. 2012-072810  
Dok. nr. 1016333

§ 37 naapertorlugu apeqqutinnut, erngup nukinganik innaallagissiornerup avammut tunisassatut atorneqarsinnaaneranut tunngasumut qjanaq.

Postboks 909  
3900 Nuuk

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

Apeqqutitit matuma kinguliani ataasiakkaarlugit akissuteqarfigissavakka:

### **1. Kalaallit Nunaanni nukissiorfiit innaallagissamik sipportumik agguaqatigiissillugu qanoq angitigisumik pilersitsisarpat?**

Aallarniutigalugu erseqqissaatigineqassaaq, erngup nukinganik innaallagissiorfimmi innaallagissiap annertussusissaanut tunngaviusumik tasiliami (isumalluutaasumi) erngup annertussusia apeqqutaasarmat, annertussuserlu nittaallat annertussusiat malillugu allangorartarpoq.

Kalaallit Nunaanni pilersuineramik suliniuteqarnermi erngup nukinganik innaallagissiorfiup innaallagissiaanit sinneruttup kissamik tunisassiornermut atorneqarnissaa siunnerfigineqarmat, tamannalu uuliamik tikititsisarnermik annikillisaataavoq. Tamatuma saniatigut innaallagissamik atuineq annertusiartorpoq aammalu illoqarfinnut nuuttartut amerliartorlutik.

Nukissiorfinit ilisimatitsissutigineqarpoq, tamanna pissutigalugu erngup nukinganik innaallagissiorfinni sippulimmik innaallagissiorortoqarneq ajortoq, innaallagissiap sinneruttoq kiassarnermut atorneqartarmat, taamaalillunilu uuliamik atuinermut killilersueqataalluni. Erngup nukinganik innaallagissiorfinnik annertussusiliisarnermi innaallagissiap sinneruttup kissamik tunisassiornermut atorneqarnissaa tunngavigalugu pilersaarusiortoqartarpoq.

### **2. Erngup nukinga atorlugu innaallagissiorfimmi innaallagissap sipportup tuniniarneqarsinnaanera Naalakkersuisut eqqarsaatiginikuunerlugu aamma tamanna teknikkikkut periarfissaqarnersoq misissorneqarnikuunerluni?**

Apeqqut 2-mi innaallagissap sinneruttup nunanut allanut tunineqarsinnaanera teknikkikkut periarfissaqarnersoq pillugu apeqqut akissuteqarfiginiarpara. Inussiarnersumik apeqqut 4-mut, innaallagissamik nunanut allanut tunisisinnaaneq Naalakkersuisut isumaliutigisimaneraat pillugu apeqquteqarfiusumut akissut

innersuussutigissavara, aningaasartuuteqartarnermi iluanaarfiusinnaasunut isumaliutersuutit apeqqummut tassunga akissutaasumut qanittumik attuumassuteqarmata.

Nunarsuaq tamakkerlugu innaallagissamut aqquiti ataqatigiit ineriartortinneqarnissaat, ilaatigut nukissiuutit ataavartut pitsaannerusumik atorluarneqarnissaat siunnerfigalugu aallunneqarpoq. Ullumikkut kabelinik HVDC-nik (High Voltage Direct Current-inik imaluunniit sarfamut sakkortuumut allanngoranngitsumut kabelit) sanaartornikkut, innaallagialu aqquut isorartooq aqquutigalugu ingerlaartinneqarsinnaavoq.

Kalaallit Nunaanniit nunanut allanut kabelilersuisoqarsinnaanersoq siusinnerusukkut Nukissiorfiit misissorsimavaat. Maannarpiaq immap itinera pissutigalugu tamanna teknikkikkut periarfissaqanngilaq, kabelit namminneerlutik oqimaassusiat pissutigalugu immap ittissusissaatut piumasarineqartumut ikkussuunneqarsinnaanngimmata. Nukissiorfiit tamatuma ineriartornera malinnaaffigilluarpaat.

### **3. Naalackersuisut ilisimanerlugu, nunat arlaat Kalaallit Nunaanni innaallagissamik sipporuttumik pisinissaminnut soqutiginninersut?**

Islandimi sullissisut namminersortut tungaanniit suliniutit, Islandimut HVDC-nik kabelilersuinertallit soqutigilluarneqarput. Tamanna pisinnaappat Europamut innaallagissamik tunisisoqarsinnaalissaaq, Islandip Englandillu akornanni nunat marluusut kabelimik atassuserneqarnissaat pillugu oqallittoqarmat.

Nukissiorfiit ilisimatitsipput, Islandimi suliffissuaq innaallagissamik avammut tunisisinnaanermut periarfissanik oqaloqatiginnikkusulluni Nukissiorfinnut saaffiginnissimasoq.

Saaffiginnissutit paasiniaanerinnaapput. Nunanit allanit Kalaallit Nunaanniit innaallagissamik sipporuttumik piserusuttunik saaffiginnittoqarsimaneranik Naalackersuisut ilisimasaqanngillat.

### **4. Naalackersuisut isumaqarnerlutik innaallagissamik sipporuttumik nioqquteqarnermi isertitat innaallagissamik siammarterinermi nunanilu allani aqquersuinerlutik atatillugu aningaasartuutit nammassinnaassagaat?**

Innaallagissiamik nunanut allanut tunisaqarnermut aningaasartuutissat ilisimanngilagut, teknologi taanna suli ineriartortinneqarsimanngimmat. Tamatuma saniatigut ergup nukinganik innaallagissiorfinni innaallagissiamik kiassarnermut atuisoqartarpoq, taamaattumillu innaallagissiaq sippoqartarani.

Kiisalu oqaatigineqassaaq, Utoqqarmiut Kangerluarsunnguanni ergup nukinganik innaallagissiorfimi, maannarpiaq Kalaallit Nunaanni innaallagissiorfinni annersaasumi, tunisassiarineqartarpoq 45 MW-mik (megawatt) annertussuseqarmat, tassalu pisinnaasaa Danmarkimi siammasissumik kiassaateqarfiup akunnattumik angissusillip pisinnaasaata annertoqatigaa. Assersuutitut oqaatigineqassaaq Horsensimi kiassaateqarfiup innaallagissiaata annerpaaffia 35 MW-tut annertussuseqarmat.

Taamaalluni erngup itissusissaatut piumasarineqartumut kabelilersuinissaq teknikkikkut ajornarunnaaraluarpalluunniit, nunanut allanut aqqusersuutitut aningaasaliissutissat 100 millioner koruunilikkaanik amerlassuseqartussaananerit ilimagineqartariaqarpoq. Tamatuma kingunerisaanik aqqusersuutitut aningaasaliissuterpiaat imminnut akilersinnaalissappata annertooujussuarmik assartuussinissaq pisariaqartussaavoq. Taamaattumik aamma nukissiamik taamak annertutigisumik pilersitsisinnalerniarluni erngup nukinganik innaallagissiorfinnut amerlasuunik aningaasaliinissaq pisariaqartussaavoq.

**5. Naalackersuisut isumaqarnerlutik nunanut allanut innaallagissamik sipporuttumik nioqquteqarnermut atatillugu Nukissiorfiit naammattumik akissaqarnermut piginnaaneqarlutillu?**

Innaallagissamik avammut tunisassamik naammattumik pilersitsinissamut erngup nukinganik innaallagissiorfinnut aqqusersuutitillu amerlasoorsuarnik aningaasaliisoqartariaqarnissaa naatsorsuutigineqartariaqarpoq.

Taamak annertutigisunut, nukissiamillu avammut tunisaqarnissamut suliniutit pisariaqartut naammassinissaannut aningaasaliinissamut Nukissiorfiit aningaasaqarnermut sinaakutissai naammangillat. Aammattaaq taamak annertutigisumik aningaasaliinermi, suliniummi annaasinnaasanut Nukissiorfiit imminnut akisussaaffilernissaat naleqqutissanngilaq. Nukissiorfiit ineriartornermut malinnaapput, aammalu pisariaqalissappat tunisassiorfiit annertusineqarnissaat ingerlanneqarnissaallu qulakkeerniarlugu suleqateqalersinnaallutik.

Inussiarnersumik inuulluaqqusillunga

Jens B. Frederiksen